



Prva presuda za planirano pridruživanje ISIL-u

HUSEINU ERDIĆU TRI GODINE I ŠEST MJESECI ZATVORA

• Midhat Trako osuđen na godinu i šest mjeseci, a Nevad Hušidić i Merim Keserović dobili po godinu zatvora • Odbrana će uložiti žalbu

Vijeće Odjela II za organizirani kriminal, privredni kriminal i korupciju Suda Bosne i Hercegovine jučer je Huseina Erdića, Midhata Traku, Nevada Hušidića i Merima Keserovića proglasilo krivima za krivično djelo protuzakonito formiranje i pridruživanje stranim paravojnim ili parapolijskim formacijama, te ih osudilo na ukupnu kaznu zatvora od sedam godina.

Organizovanje

Erdić je dobio tri godine i šest mjeseci, Trako godinu i šest mjeseci, dok će Hušidić i Keserović služiti kaznu od godinu zatvora. Ovo je prva presuda u historiji BiH za planirano pridruživanje ISIL-u. Čitanju presude u sudnici jučer je prisustvovao samo Erdić.

Sutkinja Biljana Čuković, čitajući presudu, rekla je da je Erdić proglašen krivim zato što je s ciljem pridruživanja stranoj paravojnoj formaciji koja djeluje u Siriji i Iraku, organizovao odlazak Hušidića i Keserovića s ciljem njihovog protuzakonitog pridruživanja terorističkoj organizaciji ISIL. Potom je navela da je

Trako proglašen krivim, jer je Hušidiću i Keseroviću dao potrebna novčana sredstava za kupovinu avionskih karata, te tako preduzimao radnje koje su imale za cilj njihov odlazak na strano ratište. Na kraju je naglasila da će optuženima Erdiću i Traku u izrečenu kaznu zatvora biti uračunato vrijeme koje su proveli u pritvoru. Također, optuženi su obavezani i na to da nadoknade troškove krivičnog postupka.

Podsjećamo, pripadnici Agencije za istrage i zaštitu BiH (SIPA) uhapsili su 18. februara Erdića, Traku, Hušidića i Keserovića, a Sud BiH je optužnicu protiv njih potvrdio 15. aprila.

Tužilac Dubravko Čampara rekao je da je Tužilaštvo BiH zadovoljno presudom, jer je ovo prvi ovakav presuđen slučaj u historiji. Keserovićev branjenik Senad Bilić kazao je da je presuda očekivana, s obzirom na to da je ovo prvi slučaj ove vrste. Najavio je da će uložiti žalbu, s ciljem otklanjanja mnogih nezakonitosti u drugostepenom postupku.

Klopka Tužilaštva

Tužilaštvo BiH je dokazalo samo dio koji se odnosi na dolazak do Aerodroma u Sarajevu. Ostalo je sve sporno. Nema dokaza o daljoj namjeri optuženih. Također, u presudi je navedeno da je ona zasnovana na priznanju optuženih. Bitno je podsjetiti da moj branjenik ima 18 godina, da je izjavu davao u tri ujutro i to bez prisustva advokata, kazao je Bilić.

Hušidićev branjenik Senad Dupovac, također, najavio je žalbu na nezakonitost dokaza.

Zadovoljan sam što je moj branjenik dobio kaznu ispod minimuma, mada sam očekivao oslobađajuću presudu. Ono glavno što smo mi kao odbrana istakli je prigovor na dokaze i njihovo pribavljanje, kazao je Dupovac.

On smatra da je njegov branjenik upao u klasičnu klopku Tužilaštva BiH.

Naletio je na zvrčku - kada su ga lišavali slobode, rekli su mu: priznaj da ideš u Siriju i pustit ćemo te. U tom kontekstu on je i pušten, naveo je Dupovac. **E. GODINJAK**



Erdić tokom privođenja u akciji Damask

Nevad Hušidić



Bilić: Uložiti ćemo žalbu



Dupovac: Nezakonitost dokaza